

*Adolebis, inquit, sic, cum subegeris regiones eas, ubi thura nascuntur; interea utere parce praesentibus.* Postea Alexander, Arabia, regione thurifera, redacta in ditionem suam, memor reprehensionis, olim factae a Leonida, misit ei thura multa odoresque alios, admonuitque, ne vellet post-hac esse parcus in honoribus deorum.

## CAPUT. VII.

## IMPII NON PLACANT DEUM DONIS.

1. Donis impii ne placare audeant deos: Platonem audiant, qui vetat dubitare, qua sit mente futurus deus in se ipsos, quum vir nemo bonus ab improbo se donari velit.

Jucundum non esset viro probò, accipere dona, quae non ignoraret dari animo malo. Si pietas adsit, nihil non potest esse gratum deo: contra autem, si desit.

« Atque hoc scelesti illi in animum inducunt suum,

« Jovem se placare posse donis, hostiis;

« Et operam, et sumtum perdunt.

Bias navigabat aliquando cum impiis: quum vero, tempestate exorta, navis quateretur fluctibus, illicque invocarent deos: *Silete, inquit, ne vos hic illi navigare sentiant.* Idem respondit nihil homini impio, percontanti, quid esset pietas. Quumque ille sciscitaretur causam silentii: *Tace, inquit, quia de rebus nihil ad te pertinentibus quaeris.*

2. Puras deus, non plenas adspicit manus.

Pietate, et religione, et justis precibus deorum mentes, non contaminata superstitione, neque ad scelus perficiendum caesis hostiis possunt placari.